



THeodo filius fuit Adalgeri regis Boiorū, qui ad Tolbiacum in prælio interfuit. Hunc Boij, cum fœdus inijissent cum Francis, sibi ob uirtutes primū ducem constituunt, & in eius uerba iurant. Is à Clodoueo cōtra Vestogothos in auxilium accitus, comparuit, atq; suæ fortitudinis documentū dedit. Eo enim bello Halaricus rex Visigothorum uictus, atq; gens illa in Hispaniam profligata. Tandem tamen Theodorici Ostrogothi interuentu bellum illud compositum fuit. Cum autem Theodo cum Boijs hæctenus tātūm eas terræ partes, quæ cis Danubium essent, possideret, Clodoueus Franco ei author fuit, ut Danubio trāsito fertilem illam Romanorum prouinciā inuaderet, ac suæ ditionis faceret. Itaq; Theodo, qui sua sponte laudis esset cupidissimus, anno Christi 508. Hunnorum reliquias, Abares, Auaros, & Charnos adhuc incertis sedibus uagantes in societatem belli traxit, atq; à Francis auxilia accepit. Coeūt postea duces, & de belli ineundi ratione consultant. placuit omnibus copias partiri, & diuersis locis Romanos aggredi, ne alius aliq; auxilio esse possit. Et primò castella munitiora oppugnāda censuerūt, & tandem Augustam Tiberij (quæ hodie Ratisbona dicitur) aggrediendam esse concluderunt. Re cōclusa Theodo hostem in multis locis aggreditur, atq; ferro & flamma omnia populatur. Itaq; in omnibus locis fœda fuga orta, incolæ Augustam Tiberij petunt, atq; eam natura munitissimam milite & annona implent. Hoc modo pleraq; oppida & castella, initio belli deserta, Boijs cesserunt.